

懷遠縣志卷之十九

賜同進士出身安徽鳳陽府懷遠縣知縣孫讓修

史册英賢傳

楊嘉猷字原忠別號蓋齋中都之懷遠人也豐頤碩貌而虬於腮眉生異采幼警敏有至性五歲就塾伯兄擇張橫渠先生法語訓公公作擘窠書錄置座右畢世不諼年二十六舉于鄉已遊太學彖宰畢公松坡以道器目之命題至大至剛使屬文翰動如飛元言晰理公益大奇之曰而固結聖賢之轍者耶歲歷丙申粵東楊先生復所講學中都公獲受良知之學自是恍恍乎覺滿前皆飛躍矣歲戊戌謁選得冀州守剔奸究肅馬政康功田功罔弗舉簿書之隙集博士弟子討所以致良知者而恒南自是發精一之學

焉報績得上考尋當內召或沮之遂擢延安郡丞未幾攝篆定邊築長堰禦水患民不胥溺功與考坡等前官某私庫緡二千餘公勒歸正餉而某亦斃法政治赫然改觀會靖邊司餉某亦以墨敗獄滯不決公一讞輒解塞上稱神君云公卽留視靖靖人敝積案纍千未決月餘揮披立盡故事官庭觴嘯之資咸取給於倉宰宰割廩以奉之而廩日益耗宰俱坐侵漁具五木死公蹙然曰腴人之腹而以人命爲戲吾不忍也所全活數十人而廩日裕間有邀賞者大吏咋舌下公議公疏其不可謹斥堠以伺之歲省金錢以萬計所條上邊事六按行輒效剏龍州城百雉靖故各范老闢立祠祀文正復以士習不勵則風俗頹建閣尊經置書籍百種于上召士子前曰而有性而使蔽有命而日損則母乃自罔其生耶夫

亦思人各有心心有知知之不慮者曰良誠能擴充體驗由家國天下而反之身心性情又由身心性情而推之天下國家體用一源顯微合軌載籍非外糟粕皆真不鑿其知之良而性命乃微不然而或狃於支離或淪於空寂吾見其知之曰遜也已靖之士風道然一變者公實提衡之爾時余不佞亦講學里中公穆如清風拂余紳佩枉駕修弟子禮甚恭相與商性命之旨者累日瞿然憬然婆婆位育之堂而酣暢中和之府我兩人蓋相視莫逆焉未幾公晉貳長蘆釐政秩不副効衆方爲公惜公氣益沖粹謂朝廷爲要地擇人豈不足君命乎卽趣駕之任賈人子陋規每鹽大輒計以引以朱提爲壽約二萬餘緡公絕無染指舊有落地稅五萬金有奇已奉蠲旨而有司未及知固橐中物耳吏胥微露其意公怒

咎其人曰飲民之脂而寢上德意人卽墨奚至是立卻選歲貢白鹽之役在多繻縷公條上御史臺悉汰其弊偶行部見豎龍鳳幟過市者公驚問故則運太后鹽甄也公私念宮中食鹽有常額乃復需此耶執訊之果販夫持內府賡牒罔利者悉置之理比歸時帑積羨金九千代者舉以贈公公莞然曰某有私者豈俟今日耶公理鹽二載律已過嚴輸課獨最大司農方破格示風勵而鎮遠之命下矣公駭歷仕路多異績登薦牘者二十五立祠樹碣在在社而稷之而竟不得酬以異數在公固淡然無營而造化亦欲留有餘以豐其後耳公旣倦遊歸里而所餘俸錢悉分以贈昆仲及昆仲之予若孫咸教之誦讀謀婚娶月聚族而會敦孝友斥面曲置圭田以供伏臘置蠡田以給軍裝坐卧十尺樓讀書不輟寒暑

嘗進門下士及子姓而示以致良知之宗蓋知而曰良卽至善之本體也良知而曰致卽省察克治之實功也學者能以姚江之良知爲定主以紫陽之間學爲功夫於道可稱庶幾矣又嘗謂大人修身之要在明德新民而止至善所止之地皆物也而本末分盡止之功乃事也而終始分先後辨于其間矣此古人貴握其序而修身居要也能修身而道始不離不離于靜而不覩不聞皆道矣不離于動而莫見莫顯皆道矣而方動時之機括可省者曰獨慎之而發亡踰節位育可姓臻彼君子之修己以安百姓非卽中和之極詣哉公論說根極理要而力爲體認非過屠門而大嚼者比余每稱江以北有理學三人泰州王心齋合肥蔡肖謙懷遠則有公公真聖紫陽之駕而齊以姚汪之筏者耶觀其大還時笑拂紅塵歸做盧之句而所得可知矣主持風化者能不表而出之也哉

馮從吾少墟集

### 何如寵楊公墓誌銘

明中順大夫貴州鎮遠府知府蓋齋楊公墓誌銘予故習懷遠蓋齋楊公淮北聞人有先進風而公之子太學君尙渾亦納履交予也公卒而太學君走千里謁予誌公墓予佩服有素何敢辭公諱嘉猷字元忠別號蓋齋晚年自稱養拙子直隸鳳陽人其家懷遠自始祖選洪武三年由蒙城避亂遷也選生擢擢生朗朗生華華生環環生鈞鈞以博學明經歲薦訓永平尋教授岷府娶御史魏公貞曾孫女生濂字子靜別號東泉是爲公父東泉公以公貴贈奉直大夫母陸氏贈宜人贈公卽幼失恃能

自立慷慨多志畧教授公念食貧不欲令人困儒生中因日坐黃公墟持籌養志俾教授公終身無乏絕陸宜人操作佐之事繼姑以孝聞生五子藎齋公其季也始宜人之孕公也思啖羊臘羊臘自比舍貌舉以來思啖桃桃隆冬致自異人及生而有黑龍入室之夢瑞徵見矣十閱月偶視木偶戲遂能舉手效之甫學語卽解書每夜從贈公請字贈公曰晦矣明當教汝強以腹受書晨起一一舉畫無誤其夙慧蓋如此居恒靜坐不好弄五歲就塾伯兄擇張橫渠先生法語訓公公手錄置座右終身弗忘鄰長者薛東菴先生愛之加諸膝公問難無倦書未經誦習往往默識莫測其所自來也年十三工爲舉子業里中孫斗南先生故東粵各學憲見而大奇賞曰吾小友也宜定忘年交

又曰峩冠丈夫當爲此童子執鞭矣皆其品題制義語云讀書無間寒暑漏三下始休漏盡復起贈公憂之戒勿瘁公覆燈几下俟贈公寢伊吾如故弱冠補諸生隙戶進飲食坐卧萬卷日滿書額塗一格及戶啟格無素者歲以爲常二十六舉於鄉罷公車游太學與諸名士定盟結約爲太宰松坡畢公所器重嘗因厯事試之以至大至剛命題太宰亦自屬草意紆所獨得覽公文遜謝弗若曰此詎可令子布見耶夫如公枕經藉書於一第何有哉而顧若留不盡之意以還造化公亦似有以窺其微者于是遂謁選授冀州守冀于真定稱煩劇公首問民間疾苦討利病罷行之弗激弗撓時稅璫橫甚廉得其魁黨重笞逐境內如洗復自捐公費與羨帑抵稅毋遺累窮民也渠奸萬國甯

擁眾且百露刃禦人白晝莫敢問亂形成矣杖殺之餘股粟解散而佞馬之爲冀害也積弊至一馬百餘金民甯敲髓應無誰何者公躬自驗給減直十七八或佞戶與黠吏上下其手罪罔赦卽片楮不假胥役馬政肅然蓋公之於法賞信罰必如電雷霆無留行也而顧煦煦子惠人如慈媪旱蝗害歲人相食公首請臨德二倉餘糧數十萬賑畿內大吏具上報可公循環轉輪設場煮糜七十餘所日飽萬眾口嘗而手剗之部署無譁每退食塵沙滿鬚眉嘆曰身多疾病思田里邑有流亡愧俸錢我之謂乎如是者三年一日所全活無算金矢集於庭調曲直而已弗私一緩暇則課計士弟子講性命之指刊傳習錄以訓恒南理學之大明自公始也薦剡十四上上賜璽書褒勞至以漢朱

博肅育爲比尋當內召或尼遷延安清軍同知公治延一如冀然公蒞延甫三日卽署定邊篆觀察劉公飛書促之謂邊事待公不啻掾焚拯溺公竭蹶從事百廢俱興其大者修隄防水患爲丈三百許錮以鐵石屹然長虹爲至今永利矣前官唐某私庫緡二千七百有奇公擿歸正餉帑自是無鼠角而唐亦不能自蔽其辜會靖邊謝某以昧敗畧如唐莫能省決觀察公曰非楊公不可屬公片言立判上下懾服誦神君焉因留公視靖邊篆而公一如在定邊時也署中滯案數千彌月盡理故事諸所需程饌取辨倉攢倉攢責之富室遞相索無已首裁革弗用而一切出納虛實精心鉤核使書記之積滯毋得盈縮以魚肉官攢前此邊倉爲厲府官無善終者選人視如鬼蜮公至而懲在

戒來爭樂趨恐後矣城堡祠閣庠廩兵械之類煥然屯好復條陳六事一一舉行是年虜嬪臨邊以六子轉堡邀賞王者下公議公抗持不可飭各路環甲相待折服退至今延綏得罷黃婦六男賞歲省金錢數萬公之力也公七年於邊勞苦備至兩奏程書十登薦剡制撫疏上欲酬以異數而至爵竟以長蘆漕貳處公宦無中人効亦可睹已武弁有譖公者公弗辨弁尋自敗周某代公嫌公之難乎其繼也借事相左公未嘗幾微見顏面而周竟以貪去時人服公之雅量云時運長爲常熟瞿元立先生先生理學名家公與互相裨濯漕政一新偶行部見豎龍鳳幟邪許而過於市驚問此何爲者左右曰運太后鹽輒也公私念宮中食鹽自有定額乃復需是耶鞠之果奸徒稗販所持內

府牒悉廢置之理而歲貢白鹽之役舊多乾沒不可詰遇公無弗歛手退所屬故有落地稅已奉恩免而州邑未及知也司受徵解卽已物胥以往事請公愕且怒謂此孰非朝廷德意小民脂膏况金以五萬計雖墨何至是立卻還卽不便于其所爲前後者弗暇顧而賈人子陋規歲進茶菓銀以引爲差所從來遠矣公在事掣引百餘萬例進二萬餘緡也人咋舌不敢獻又何敢望假借爲奸利乎其歸也帑無各之金九千代者舉以贈公笑曰如私之尙待今日耶漕司故羶地公約已太廉輸公獨最聲凡勒碑置祠謳吟而尸祝之在在不朽而行古道于今時逢世未易公亦自此倦遊歸里始終留有餘不盡之意焉家食七

年築會景樓讀書其中坐終日不移席惟月鳩羣從而燕喜之  
教以孝弟和睦養廉之羨與兩兄共有無復置祭田軍田若干  
畝爲族人代費條然玩世獨以清白遺子孫也一日忽賦詩有  
笑拂紅塵義皇夢覺之句手授其子太學君弗爲意越旦具衣  
冠拜竈與賓客子弟談笑竟日夕登樓沐浴端坐而逝絕不聞  
喘息聲人或謂公尸解始悟公詩乃辭世語矣居恒謂太學君  
曰異時吾大還家人毋勦我當清靜以還造化及卒果如其言  
公方面美鬚眉白皙魁梧男子少稱書淫乃忽然慨嘆曰章句  
間遂老丈夫耶因取金剛壇經諸內典默坐冥參恍然自得有  
咫尺元關之意曩所讀百家子史糟粕視之會復所楊先生講  
學中都公獲聞良知密旨語下大悟覺鳶飛魚躍真在目前也

及關中從少墟馮先生游愈入實際馮先生每稱江北理學三  
人泰州王心齋合肥蔡肖謙其一蓋指公云公天性孝友諸生  
時失期公哀毀骨立後遂與宜人同寢處溫清必恭荆庭萼樓  
怡怡如也不喜談人過失宦游絕不言地方薄惡常曰一言地  
方薄惡便非父母斯民之意及聞人片善譽不啻其口出焉公  
蓋生而近道以學濟之名賢切靡有本者如是耳所著述有詩  
文全集傳習錄清粹錄就正錄逆說居身拱壁註國朝各賢纂  
諸書行世生於嘉靖三十九年辛亥七月初六日午時卒於萬  
曆四十五年丁巳十二月二十三日亥時壽六十有七以萬曆  
四十七年己未十月二十四日葬于塗山之陽娶劉氏封宜人  
子一卽太學生尙渾娶張氏孫男五人培永培根培生培鼎培

造生女二人長配許梅貞穉次許配段可學銘曰溫而栗所其無逸維公之德好而樂有殖母落維公之學作而述式纘厥錄維之福大而昌百世斯皇維公之藏

楊應聘字行可時秀孫萬厯己卯科舉人癸未進士授浙江烏程縣知縣陞兵部車駕司主事厯陞職方司郎中丁憂起補原職戊戌會試分春秋房後陞光祿寺少卿丁憂復補太僕寺少卿巡撫甯夏尋總制三邊兼右副都御史兵部右侍郎內轉兵部左侍郎卒于任贈兵部尙書賜祭葬節操經濟爲時所推

舊縣志

舊府志應聘總督西陲運籌柔遠有柱鎮玉門增雄百二之稱楊氏家譜應聘字行可號楚璞中萬厯己卯科南畿鄉試登癸未進士初任浙江湖州府烏程縣二任兵部車馬司主事三任

本部職方司主事四任本司署員外郎五任本部署武庫司郎中六任本部署職方司郎中七任實授本司郎中八任復補本司郎中九任光祿寺少卿太僕寺正卿陞巡撫十任兵部左侍郎兼左都御史節鎮甯夏三邊總制萬厯四十八年卒論祭文曰維萬厯四十八年歲次庚申七月丙子朔越初六日辛巳皇帝遣禮部署部事右侍郎兼翰林院侍讀學士孫如游賜諭祭兵部左侍郎楊應聘文曰惟爾學蘊宏深才猷練達英蜚甲第奏最花封入佐夏官疇播殄而平壤戢再陟卿寺逋弊剔而馬政修迨廣武建牙綢繆尤謹於屯塞洎關陝總節威權屢振於馘擒氣奪旃裘甲兵隆韓范之望功高保障謀猷著方召之聲特召師貞俾叅樞政命不俟駕君爾忘身廟算傲精筭芒掩宿



義盡臣瘁忠軫朕懷祭葬載頒爾其歆服又諭葬碑曰維天啟元年歲次辛酉八月庚午朔越初三日壬申皇帝遣直隸鳳陽府知府李枝秀特諭祭原任兵部左侍郎封兵部尚書楊應聘下葬文曰爾以文武矜式出入賢勞方贊樞籌遽藏邱壑爰期奄至良增悼傷兆祭有儀用慰冥漠歸然馬鬣煥矣龍光右碑在墓道高八尺字大如盤

按應聘卒以萬曆間十八年其總制三邊不知其何年明史中無一字及之者楊氏譜雖載歷官次第而不載陞遷之年月居官之行事惟論祭碑文稱其氣奪旃裘功高保障畧可想見勳績耳里中人相傳云應聘乃溫體仁之師蓋其令烏程時所賞拔士也及體仁立朝險狠應聘絕之遂相惡及應聘卒例得入

國史傳以事蹟上會體仁當國陰去其稿故應聘明史無聞又舊縣志以光祿寺少卿丁憂起復補太僕寺少卿而楊氏譜并光祿寺太僕寺及陞巡撫爲一任又不著巡撫何地節鎮甯夏亦無此官各皆修譜者之失也

孫元謨明史王三善傳天啟元年十月擢右僉都御史代李樞巡撫貴州時奢崇明已陷重慶明年二月安邦彥亦反圍貴陽樞及巡按御史史永安連章告急趣三善馳援十二月朔貴陽圍益急乃分兵爲三副使何天麟等從清水江進爲右部僉事楊世賞等從都勻進爲左部自將二萬人與叅議向日升副總兵劉超叅將楊明楷劉志敏孫元謨王建中等由中路當賊鋒舟次新安抵龍頭營超前鋒遇賊衆欲退斬二人乃定賊酋阿成驍勇超率步卒

張良俊直前斬其頭賊衆披靡三善等大軍亦至遂奪龍里城諸將議駐師觀變三善不可策馬先邦彥疑三善有衆數十萬乃潛遁餘賊退屯龍洞官軍遂奪七里冲進兵畢節舖元謨明楷連敗賊其渠安邦俊中礮死生獲邦彥弟阿倫遂抵貴陽城下賊解圍去

舊縣志孫元謨幼有大志天啟七年黔賊宋萬化等猖獗五省告急大司馬咨送黔撫隨征謨抵黔知十板三寨爲賊所恃破之龍里衛人爲賊據謨以奇兵取之骨龍司懸崖劍壁謨令軍士脚枚暗渡立破其司復大戰七里冲進兵畢舖賊騎如雲謨以所製木發貢七門齊發擊死數萬直追至老鴉關解貴陽圍合郡德之後率兵渡陵廣江搗賊巢悉平貴撫上其功授副總

兵管通鎮遊擊事歷任昌鎮副總隨陞薊鎮總兵都督同知年老乞致仕

按縣志所志與正史多牴牾貴陽被圍在天啟二年非七年安邦彥反洪邊土司宋萬化糾苗仲九股陷龍里以附邦彥者非賊首畢節舖訛畢舖陸廣河訛陵廣王三善傳舉劉起爲總兵令渡陸廣旋卽敗歿無孫元謨名而大司馬黔撫貴撫等又不載其名皆參差不可據後見孫氏所呈家譜乃知前志據譜直書未加攷正也姑附載而辨之

國朝宮兆麟懷遠人由貢生捐授湖北安陸府通判乾隆十六年遷江西南昌府同知十八年遷福建興化府知府二十七年遷山東濟東道二十八年遷山東糧道三十一年六月遷湖南按察使

時桂陽州民侯七郎毆斃大功服兄侯嶽添賄其兄侯學添誣服知州張宏燧率定讞巡撫李因培駁審適調福建奏明案多可疑勅新任巡撫常鈞詳訊兆麟蒞任鞫實審辦會審官窺常鈞庇宏燧多觀望以兆麟不與會審承審各員聯銜會印侯七郎又極口呼冤奏令委審兆麟亦以侯七郎實正凶侯學添得賄頂凶入告命侍郎期成額會湖廣總督定長審理尋訊明正克侯七郎抵罪宏燧回護原招故出人罪擬流會審知縣李時等革職

命常鈞來京方案之既定猶未入奏也兆麟以長沙知府李拔所訪宏燧買金託湖北藩司赫昇額行賄翻案密稟期成額等奏聞逮訊宏燧無買金行賄事其差借武陵縣銀五千係迎合巡撫李因培藩司赫昇額抵解桂陽代還武陵叅革知縣馮其柘虧空

因盡得赫昇額前任湖南藩司與宏燧交結保薦宏燧常鈞遂題陞知府狀均擬斬詳因培傳常鈞奉

旨革職三十二年兆麟調雲南按察使三十三年三月遷雲南布政使十月擢廣西巡撫三十四年雲南軍營需硝

勅兆麟籌辦四月奏言廣西歲產硝八萬四千餘斤除各營製火藥歲餘八千五百餘斤臣先將舊存硝七萬八千餘斤解至剝隘交滇員查收復於通省各營額貯火藥五十二萬九千餘斤內撥二十萬一併運滇所需製備工價核實咨滇解粵歸欵庶免遞延并省到滇製配得

旨嘉允十二月調湖南巡撫三十五年三月調貴州巡撫桐梓縣刁民聚眾滋事

命速赴任緝捕兆麟會同

欽差湖廣總督吳達善等緝獲正法復奏言起釁由桐梓縣協辦兵差按畝派馬眾疑董事紳士有侵漁弊一唱百和釀成大案奸民聚眾罪有應得州縣遇派辦公事亦當防董事侵漁早爲清算使知派皆實用疑釋心平乃置之不問地方官之闕茸可見貴州兵差大概皆然臣飭各府督州縣將兵差領公項若干派民若干有無餘剩勒限算清書簿傳紳士保甲同董事查閱使百姓曉然仍詳報查核不卽清筭者參革

上是之七月古州黨堆寨逆苗香要不法偕吳達善等督兵捕誅之

上以所辦迅速妥善議敘加一級兆麟因條奏善後宜一下江營

四面皆苗南界廣西爲古州扼要地舊設兵五百除撥丙姝兩山及各塘汛存城兵止二百三十請撥古州鎮標兵二百移駐下江營一定且營在古州上游山後皆生苗原設兵二百六十除安設塘汛止存兵百九十五請添撥古州鎮標兵一百駐防一下江城原設吏目一員秩卑不足彈壓應汰請移貴陽府通判駐下江隸黎平府分撥古州廳屬下江一帶苗寨合管理其吏目經理兵米卽交通判支放定爲苗疆久任要缺在外揀補一黨堆寨苗民老响以阻香要謀殺王弁廳差全家遇害臣令於寨地廟祀並將其死義板旌及香要等叛逆伏誅用苗語譯出榜于廟使衆歲時展詳知警一下江營向有牆周四百三十丈高一丈內住兵民二百餘戶日久牆傾臣籌捐修改立土城得

旨如所請行九月奏言本年入夏米昂臣飭屬將常平倉米不拘存七糶三之數減價濟民查通省貯米八十三萬餘石今自三月開糶至七月各處倉儲皆虛查郎岱廳龍里修文安平清麟普安安南遵義桐梓綏阿夔安湄潭十一縣開州永甯平遠黔西正安五州向有餘米三萬四千餘石留爲上年平糶交價解存道庫前撫臣圖爾炳阿奏明改收折色貴州山多留備下年平糶况少糶常平則採買亦少民免苦累倉廩亦不虛懸奏入報

聞先是四五月間兆麟請於鄰省湖南四川廣西買米運黔糶濟至秋豐收復奏請停運上飭其冒昧于前勅令以後遇事須持要詳籌兆麟又奏請簡發知府三員赴黔

諭曰知府有董察屬員之責民生吏治攸關簡用時特加詳慎若如宮兆麟所奏勢必將部中分別繁簡司員發往此端一開各省效尤踵至需人日多不特遇有要缺簡用無人並於吏部選法有碍且此等發往人員既在外省其權皆在督撫倘因得缺稍遲或擇缺美惡必至夤緣請託遂開倖進之門宮兆麟率爾陳奏殊不可解傳旨嚴行申飭十月

諭曰宮兆麟自調任黔省以來觀其所辦諸事時露輕率冒昧之意如前此奏請簡發候補知府及停發兵米二事未能詳度事理率意陳奏業經降旨訓飭昨觀音保到京質審事竣因與該撫會經共事令軍機大臣傳旨詢問該撫居官如何據稱宮兆麟爲人粗率喜於自誇遇事不能精細其言實屬切當看來宮兆麟之爲

人應對是其所長而於辦事殊少實際是以外間竟有鐵嘴之號朕亦頗有所聞巡撫爲封疆大臣責任綦重倘遇事不能審慎精密徒以口給便捷爲能必致貽誤公務卽如觀音保在藩司中歷任有年朕因其人粗率是以未經擢用巡撫今粗率如觀音保尙以宮兆麟爲粗率則其氣習更甚又不問可知矣但該撫現未蹈罪愆猶當加以諄切訓誨使知所悛改著傳諭宮兆麟速行猛省痛改前非凡事實心實力出以持重周詳毋謂旣得巡撫竟自志足意滿一任誇張痼疾不能力圖懲創以致自貽伊戚悔之無及也十一月

命來京陞見尋降補甘肅按察使三十六年二月

諭曰去秋宮兆麟奏屬員賢否摺稱金祖靜兩耳重聽因臬司爲

刑名總匯若果耳聾卽於聽斷非宜傳諭宮兆麟俟三寶回黔後卽令金祖靜來京初不必告之以故今日閱金祖靜摺則稱撫臣恭祿廷寄轉行宮兆麟所辦甚屬錯謬寄信諭旨理宜慎密豈可輕洩於人若抄錄轉行則更無此情理前因宮兆麟在湖南臬司任內辦事尙能認真是以特加擢用及簡任巡撫以來見其辦事粗率動多舛錯看來不過專恃口給毫無實際之人難勝封疆重任因將伊降補臬司尙不意糊塗不曉事竟至于此昨來行在召見看其精力亦漸就衰並不能如前此之奮勉著傳諭明山俟宮兆麟到任後傳旨申飭並爲留心察看如其辦事仍不著要或神氣日復衰頹卽據實奏聞毋稍徇隱三月以貴州巡撫任內失察廠員王藻元等虧欠鉛斤革職四十一年三月

上東巡兆麟迎

鑾

詔給三品銜四十六年卒

國史名臣列傳

中丞曾孫編修宮煥呈中丞行述府君姓宮氏諱兆麟字伯厚號玉巖先世本句容人始祖諱寬樂懷邑風俗淳朴因卜居焉世以儒術爲業十一傳至高大父諱普邑增生大父諱建章康熙丙子舉人庚辰進士河南虞城縣知縣屢遷吏部稽勳司郎中大父諱大觀弱冠食餼於庠循例入成均府君生而穎異性孝友嗜詩古文辭過目輒不忘學爲制舉藝出語驚長老然意不甚屑也丙午先大父爲府君援營田例試職得別駕未幾先大父下世既終喪需次銓曹時年二十九歲初選湖北安陸府

懷遠縣志

卷九

英賢傳

十五

通判時沔陽州隸安陸郡治濱臨大江江水歲爲民患堤屢築屢圯府君櫛風沐雨不憚勞瘁往來堤上相度情形白之上官請帑修築沔之人數十年食粒無苦者府君之力也乾隆七年壬戌補行計典制府那公蘇圖中丞晏公斯盛首以卓異薦剡八年引

見奉

旨回任候陞漢口鎮者南北水陸衝衢也市舶輻輳商販雲集且爲鹺務要津同知一缺尤難稱職上官檄府君攝之府君興利除害革陋規剪奸慝清理案牘一年之間民安物阜江陵爲附郭首邑風稱難治太守某辦理里正一案拂上官意檄府君署理將以發太守之伏也府君檢案次第辦理兩月後在謁制府

中丞爲地方陳疾苦白太守之無私上官有公正之稱百姓有神明之頌丙寅

題陞沔陽州知州未抵任而楊太夫人凶問至奔喪歸里服闋謁選辛未補判福建福州府次年壬申陞南昌府同知時鄂剛烈公巡撫江右一見府君奇之檄委辦理偽稿及命盜諸大案見知益深以堪勝郡守首入薦牘奉

旨補授福建興化府知府在閩十年案無留牘中間兼守汀漳署理興泉兩道正已率屬矢慎矢公興水利立學校創立育嬰堂養濟院凡利民之事知無不爲二十七年俸滿引見五月初八日奉

旨記名遇道員缺出列各具奏卽於二十一日奉

懷遠縣志

卷九

英賢傳

十六

特旨補授山東濟東泰武道二十八年糧道員缺奉旨於通省道員揀選調補中丞崔公應階列府君名入奏奉

旨俞允乙酉

翠華南幸德州爲入境首站府君祇肅將事蒙

召見兩次

詢問地方情形糧儲利弊奏對稱

旨丙戌五月奉

旨補授湖南按察使三楚夙稱健訟案多棘手府君抉摘精詳不敢絲毫瞻徇由是上洽

聖心調任滇省旋陞雲南布政使直緬匪跳梁軍需旁午府君駐



永昌籌運糧餉往來接濟大學士舒公赫德協辦大學士阿公里衮倚之如左右手在藩任凡四月蒙

恩簡昇廣西巡撫府君自念以府倅微員豪無汲引之助蒙

皇上殊恩拔於庸眾之中昇以封疆重任益思感奮自効時赴滇官兵路斃人命府君奏請正法由是軍心股栗閭閻不擾己丑十月遵

旨

陞見蒙

詢緬匪情形府君據實陳奏

聖心嘉悅在京十數日

召見六次

懷遠縣志

卷九

英賢傳

十七

賞資無數奉

面諭回任出京六日奉

旨調任湖南庚寅正月調補貴州巡撫維時黔省

欽差兩湖制府吳公達善少司寇錢公維城少司馬富公察善駐

省審勘事件府君會同

欽差悉心籌畫動中竅要上符

宸衷將竣事而桐梓奸民搦眾摔尉跳梁貽害釁由邑令派里民

夫馬協濟卽岱臺站糗糧芻糈則里民自裹路遠而費糜民不

堪命府君查辦詳慎殲其渠魁民心帖然古州苗民香要者糾

眾殺差肆其猖獗府君帶兵直搗巢穴分兵三千搜緝山箐林

麓殮風宿露七十餘日獲首犯并其尤黠者置於法初苗人有

老响者因香要煽亂爲陳說

國家恩德并諭以禍福香要怒而殺之一家七口同時遇害府君嘉其知大義乃一門慘死奏請

旌表並爲立像設祠以時祭享俾苗民共知警惕

諭旨嘉悅允行是年黔省荒歉米價昂貴府君晝夜籌畫飛飭各屬開倉平糶不得拘存七之例捐資設立粥廠加意災撫綏務期黎得沾實惠威甯州向產鉛斤歲貢寶泉寶源兩局鼓鑄之用州牧董其事積弊之後爐欠厥欠甚多府君因督催不力降補甘肅按察使未一月又因威甯場欠逾限不完部議落職乾隆三十六年六月也恭逢

慈甯皇太后八旬萬壽府君由甘肅來京叩祝荷蒙

懷遠縣志

卷九

英賢傳

十八

恩旨降二等賞給職銜並有俾得優游林下頤養天年之

諭十二月回至里門府君年已六十五矣四十一年

聖駕東巡府君至德州迎

鑾蒙

召見奏對良久

賞給三品銜大緞二疋四十五年

南巡赴紅花埠接

駕蒙

召見

詢問地方災賑情形府君據實奏對

天顏霽悅

賞大緞三疋七月赴熱河

行在叩祝

萬壽蒙

恩賞宴

溫諭回里府君器宇端凝喜讀書周知細故曲體人情公餘唯手一編朝夕不輟生平勤慎自矢泊然無欲待人行政一以至誠爲主識力堅定見義必爲所設施必求有裨

國計有益民生而後卽安爲屬吏雖上官嚴厲於所當爲者必侃侃指陳無少回曲任大僚事無鉅細必詳審再四見旣確卽奮迅爲之雖衆議紛如不顧也與人接初覺孤峻日久益見和易尤喜汲引文士遇翹秀必獎成之在江右則今少司農彭公元

懷遠縣志

卷九

英賢傳

十九

瑞在山左則今刑部主政方公昂其尤著也僚屬進謁亦必假以顏色俾得盡所欲言然不可干以私生平無援引結納之助  
屢蒙

聖慈垂鑒自奉儉約居官居家子弟家人不敢綺麗相尙故屢任封疆囊橐蕭然嘗懸一聯以自警曰不要錢原非異事太要好亦是私心可以見府君之志矣府君在官三十餘載優游林下十餘年生於康熙四十五年丁亥二月初二日戌時卒於乾隆四十六年五月初八日子時享年七十有五

宋元俊字甸芳江南鳳陽懷遠縣人以武進士任四川城守營守備遷阜和營遊擊乾隆三十六年夏金川酋索諾木襲殺革布土司其黨小金川酋僧格桑亦發兵侵明正土司據班爛山阻官兵

進路被害者相繼告急總督阿爾泰知公素得夷心命抵賊巢責問原委公至刮耳崖索諾木迎謁詭以革番內變爲辭公知其詐歸告阿公曰兩酋犄角爲姦雖陽公順而陰怙惡非壹大創不可如興師當先取小金川卽獻三路進兵之策一從班爛山直探小金門戶一從堯磧截取甲金達山梁救達圍而趨美諾一繞小金川尾閭由約咱進攻遜克宗阿公以其計奏聞

上命副將軍溫福提督董天弼分路進兵總督阿爾泰駐劄後路居中控制當是時蜀救甯日久文武恬熙一旦軍興相顧暗嘆兩金川地勢奇險礮卞柴立兵將未言色沮公獨能聚米借籌歷歷指畫于是諸將軍運糧出戰一切惟公是詢公探知小金川所佔明正之達頂山梁與巴底巴旺毗連密令叅將薛琮挾巴酋暗擊

山梁而自統兵從甲楚渡河攻之賊腹背受敵大驚奔潰收復納頂礮寨百餘卽用納頂土百戶爲前導直搗約咱賊愈困聞天兵至卽走登時提督董公破甲金達副將軍溫公收復班爛山克卡了

上嘉之擢松潘鎮總兵賞花翎時三十七年正月十日也計進剿小金川未及五月而侵地全收

聖諭褒美公愈感奮將直搗賊巢旋奉將軍命調回籌辦什咱事宜受代而行方攻奪河東時小金川求救于索諾木索諾木許之將襲我後路公得巴酋密報遣使至刮耳崖罵責之索諾木知情得撤回原兵於要隘處增礮固守公請于制府曰大金川逆形已露不可不誅然犯險強攻徒損士卒不如卽用革布逃酋其人

報讐雪恥之心尤悉地形可使也遂密遣番民乘夜踰山約諸酋  
連結各寨爲內應而自率遊擊吳錦江等由節木郭渡河據勺藏  
橋舉砲爲號革番從內突出與官兵合力夾攻斬千餘人進圍丹  
東角洛收復革境三百餘里事聞

上愈嘉獎賜荷包寵異之先是公別遣守備陳定國潛赴綽斯甲  
布土司屯兵甲爾壘壩上聽候調遣人莫知其意及革境全平金  
酋畏綽土司之躡其後不敢傾巢出戰大兵雖在東南而制勝則  
在西北甲爾隴上雖按兵不動而金革兩處已扼咽喉公算畧深  
沉皆諸將所莫及時

上意大兵乘勝即可擒取索諾木而公言兵少未可輕進爲制府  
所劾調回大營隨卽革職鬱鬱不得志病卒於軍年五十八公長

身蓋立音響如鐘鼙尺許望而知爲偉人料敵審勢毫忽不爽初  
收復草番所用兵不過千許及進攻金川公建議北路必需三萬  
人當事者疑公怯不聽所請卒無成功後副將軍明公廣集漢兵  
土兵三萬人先通路後進兵其言始驗公待士信用法嚴與參將  
薛琮交最厚攻小金川時制府重公命以遊擊領兵節制諸將公  
磨利刃與薛約曰某地某日會我後至君斬我君後至我斬君及  
公至所期處而薛逾二刻始來公遣飛騎持刀呼取薛參將頭薛  
望見笑曰薛頭與賊不與公也奮前奪數礮反公猶手縛之請罪  
于制府以功論贖乃已先是馭番者平時視若草芥及蠢動又畏  
如虎

國家所賞繪帛易以窳濫酋叩頭領謝去歸視大恚笑擲於路公

有賞必佳物其人輒喜相告或昇公抵其巢率妻若女環侍左右  
公賜以茶烟簪珥兒子畜之小不循法立加笞呵威悚息聽命打  
箭爐邊關以外官將行李俱畏夾壩出沒惟公與果齊盛太守之  
箱篋蠻夫爭爲背負或遺于路必擊送行幄諸審小有動靜先來  
告公以故凡所料判動合機宜死之日番人刳面環哭聲振巖野  
平居以忠議自許思立功名然性剛能恤下不能事上偶有議論  
慷慨迅厲旁若無人以致讒忌者眾身後家籍沒兩子戍邊有張  
芝者以走卒隸公麾下拔至叅將四十一年春大將軍阿公桂平  
定金川凱旋時芝書公戰狀抱一册哭陳軍門將軍代爲奏聞邀  
恩赦其子歸人莫不嘆張能報德公能知人 袁枚小倉山房集

顧浩宋將軍詩威信征西後昂昂孰與謀宋公文武畧直欲邁

懷遠縣志

卷九

英賢傳

一一一

前修

岳威信公鍾琪以征西功受封十三年擢兵時直入紆策

存孤孽

華什咱土司被金酋計滅其子逃匿舅氏河爾肩輿懾

眾酋

公體胖軍中常乘肩輿當兩金猶厥時四塞戒公奉調

以禍福命毋許助小金且假道攻小金約咱一帶番直言多士

恐狂疾一軍憂

時官眾已取約咱圍翁古賊守險適革什咱已

山梁攻取翁古後路至火龍溝一軍蕞焉公據實奏功以成謀

積名將惠澤留至今南徼外猶聽說輕裘

公本文士改武成名儀範

聞其名無不畏卽之恂恂書生也出師數載算無遺策番眾懾

服奉之如神至今猶名怖啼兒余兩

王大壯字烈文中式乾隆癸酉科武舉兵部檢選發肅春營試用

以捕盜功補靈璧縣千總庚辰赴武會試成進士發浙江候補守

備攝巖州象山諸營地皆濱海盜賊之所出沒大壯至增汎嚴詰捕獲無算岳威信公鍾琪方提督兩浙奇其才授以所著火龍神器等書指其座曰他日宜坐此尋調補四川泰甯協黎雅營守備提督岳鍾璜先後閱兵黎雅兩居最因保薦遷嘉順營都司乾隆三十六年大軍勦兩金川松潘鎮總兵宋元俊薦大壯才可用元俊大壯鄉人也以威畧著聞慎許可時建昌鎮總兵音泰方領兵協剿乃題大壯署建昌中營遊擊復特奏權總兵事大壯籌度邊形攻戰之具於常用器械外所需無不辦者建昌之地東接涼山諸蠻蠻皆悍惡時出剽掠或以貿易入城市輒竊漢民童稚以出爲奴婢漢民或犯法逃入蠻蠻輒匿之居民入山樵一月定以兩期否卽爲所驅殺應納官蕎糧往往抗不輸吏不敢催蠻酋犯法

者酋長戮之仍斂銀于受戮者之家謂之玷刀銀所斂至百金不足則徵之于其種羣酋苦之酋長安士依陸世采者尤凶狡不法所謂金川大十八涼山小十六也以縣役奪蠻物擁眾屯城東曰必盡殺縣役大壯率目兵十餘自往撫諭蠻挺刀虜至大壯發聲吐之皆辟易不敢動縛兩酋以歸將斬之而聞于制府其頭人十四酋捧香來爲兩酋乞命大壯設軍容召十六酋跪階下數之曰大皇帝賞汝以名銜榮汝以章服曾無尺寸報徒犬豕聚爲一方害斬汝尙不蔽汝辜念殺汝如殺蟻耳姑與汝定約束能遵奉者斃貫汝死諸酋股慄叩首曰惟命乃與之約曰道路行人毋許剽劫所竊居民童稚及藏納漢奸立時送出增樵探之期及期酋長輪派首目護視應納蕎糧酋長征收解官毋得逾限軍需運送輪

日撥酋承應供役其玷刀銀永行禁止凡七事亦革舊時總兵標官薪炭坑冶陋規毋許科索諸囚感泣聽命乃杖兩酋而縱之隨反童稚及逋逃百數輩居民歡呼金川凱旋定西將軍阿桂深器之欲以大壯補建昌鎮會與南路叅贊傅德𪚗𪚗遂止部敘授貴州撫標右營遊擊四十六年四川噶嚕嘯聚侵軼及滇境犯遵義仁懷營都司堵禦受傷巡撫檄大壯以外委一員兵五十合所部兵二百餘往援之且曰兵不足卽沿路調發大壯曰噶嚕烏合之衆不足以當練卒無需多也日夜疾馳至遵義噶嚕陣而待大壯大呼馳之衆皆披靡斬首二百級生獲百人遂入城噶嚕見官兵少次日復圍城大壯潛師出西門誘之前發所自制滾地雷火器擊之所殺無數復合戰大敗之噶嚕夜遁大壯欲益師與蜀合

勦以書請于巡撫曰噶嚕以一時之奸究招內地之逃亡蠶叢路險藉以稽誅蟻穴糧空還思攫食始則探囊挾篋繼乃持挺揭竿守土之吏徃其行劫之微莫思後患迨經容納之後彌護前非但有包荒更無長策日月既久根株愈深茲乃又顧之他首加于我懷陽守將迎拒被傷播郡編氓聞聲思竄某憑藉威神立時剪撲而狐鼠之技窺伺難防宜乘摧拉之機便作殲除之舉乞飛檄成都連兵羅甸徵芻轉粟協力同心水邊夔門無令東逸陸屯錦左絕其西歸黔筑犄其南果達搗其北庶幾掃空巢穴永靜邊陲巡撫以噶嚕已驅出界不果行但獎慰之大壯猶窮追至蜀之合江縣去播州六百里復殺數百人生擒二十人以畀合江令曰以當軍中之費其年以政軍卓薦遷朗洞營叅將會甘肅逆回滋事議



增營汛總督富綱以大壯練營務檄赴滇議之大壯曰滇黔營汛  
棋布星羅極爲周密事與隴異隴省始因西師浮費虧帑于每兵  
百名扣二十五名糧餉填抵繼復移供屯田永不招補遂至單弱  
自某言之恐亦由將弁 于訓練所致崆峒人武自昔稱雄漢選  
良家必於六郡唐募勁卒無過朔方平時能好以眾整臨陣自能  
以一當百非惟滇黔不必增卽隴西第招補如額可矣議遂定旋  
檄攝上江副將復攝清江副將卽具奏實授會丁母憂歸哀毀致  
疾未畢喪而卒年五十有八乾隆五十二年也大壯器宇魁岸材  
武絕人尤善射能別出新意其遇人伉直不回然沉深有度未嘗  
妄發慕漢楊伯起之爲人自號曰關西喜讀書爲詩文皆雄健颯  
爽不事雕琢在浙時侍威信岳公馬上射皮球一發毬起與馬平

再發毬高數丈三發箭貫毬直墜岳神之間其故曰此善用拇指  
及掌後右臂耳一再起箭法三乃蓋箭法也其爲嘉順都司時

赴金川軍營干總劉

騎而導過

縣以供帳薄攘臂大詬勢甚張大壯往慰以好語乃蓋肆大壯怒  
批以掌劉失色喪氣上馬去人謂大壯彼且蒸君未幾 還劉

仍從至則徒行求大壯解投謁入且拜且自訟曰某年少恃氣向  
所爲殆非人承公之儆而教之也知悔懼矣願北面爲弟子大壯  
延之坐勗以讀書劉因問韜鈴之學大壯曰吾所謂書非韜鈴乃  
規矩也將如心學爲將當學治心劉再拜去其後劉累官至總兵  
猶時時語人曰曩不遇王公不至此也

姚鼐江南通志稿

廩生王文勳校字

